



Na osnovu člana 17. stav 2. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61a. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu tužilac Sanin Bogunić, predsjednik Vijeća, sudija Sanela Gorušanović - Butigan i sudija Velimir Ninković, potpredsjednici Vijeća, te sudija Izo Tankić, sudija Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, sudija Obren Bužanin, tužilac Saša Sarajlić, prof. dr. Džamna Vranić, tužiteljica Željka Fabić, advokatica mr Duška Bogojević, advokat dr. sc Davor Martinović, advokatica Elma Veledar Arifagić, na sjednici održanoj 24. i 25.09.2025. godine, donijelo je:

RJEŠENJE

o imenovanju tužiteljice Okružnog javnog tužilaštva u Prijedoru

- I. Za tužiteljicu Okružnog javnog tužilaštva u Prijedoru imenuje se **Laćman Bojana**.
- II. Datum stupanja na dužnost imenovane Vijeće će odrediti posebnom odlukom.

Obrazloženje

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašeno 2 (dvije) pozicije tužilaca Okružnog javnog tužilaštva u Prijedoru.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4), a u vezi sa članom 60. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Vijeće je za jednu oglašenu poziciju tužioca okružnog tužilaštva imenovalo najbolje rangiranu kandidatkinju Laćman Bojanu, dok je za preostalu drugu oglašenu poziciju donijelo odluku o ponavljanju konkursa.

Dakle, razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za prvu poziciju tužioca Okružnog javnog tužilaštva u Prijedoru imenuje prvorangiranu kandidatkinju Laćman Bojanu, srpske nacionalnosti, koja trenutno, a od od 13.10.2021. godine, obavlja poslove sekretara u Okružnom privrednom sudu u Prijedoru. Kandidatkinja je od 2018. do 2021. godine obavljala poslove stručnog saradnika, a od 2017. do 2018. godine bila referent za obavljanje pravnih poslova u navedenom sudu. Od 2013. godine do 2015. godine kandidatkinja je obavljala poslove pravnog saradnika, a od 2012. do 2013. godine poslove pripravnika-volontera u Osnovnom sudu u Prijedoru.

Vijeće je, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kriteriji stručnosti i sposobnosti pravne analize imenovane kandidatkinje utvrđeni su na osnovu rezultata kvalifikacionog i pismenog testiranja, dok su ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti, utvrđeni na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH.

Kada je u pitanju broj ostvarenih bodova, Vijeće je imalo u vidu da je imenovana prvorangirana kandidatkinja Laćman Bojana u toku konkursne procedure za kriterij stručnosti i sposobnosti pravne analize ostvarila 97 bodova od mogućih 100, dok je na razgovoru pred nadležnom komisijom Vijeća u pogledu drugih kriterija ostvarila 9,9 bodova od mogućih 20, što ju je u konačnici rangiralo na prvo mjesto rang liste kandidata sa ukupno ostvarenih 106,9 bodova od mogućih 120.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (1) tačka a) i 59b. st. (2) i (4) Poslovnika VSTV-a BiH stekla uslove za predlaganje i imenovanje na poziciju tužiteljice okružnog javnog tužilaštva, Vijeće je vodilo računa o okolnostima koje su relevantne za procjenu podobnosti kandidatkinje iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom tužilaštvu, u smislu člana 43. stav (2) Zakona o VSTV-u BiH.

Vijeće je prilikom imenovanja navedene kandidatkinje ocijenilo da ne postoje okolnosti koje izazivaju sumnju u pogledu podobnosti za poziciju za koju se prijavila.

Adekvatna nacionalna zastupljenost u konkretnom tužilaštvu utvrđena je na osnovu popisa stanovništva iz 1991. godine. Nacionalna struktura 11 tužilaca, prema navedenom popisu, trebala bi biti: Bošnjaci (4,2), Hrvati (0,5), Srbi (5,5) i Ostali (0,8). Trenutna nacionalna struktura 8 tužilaca, sa uključenim odlukama Vijeća o imenovanju donesenim nakon 01.03.2025. godine: Bošnjaci (2), Hrvati (0), Srbi (6) i Ostali (0). Prema navedenoj nacionalnoj strukturi u Okružnom javnom tužilaštvu u Prijedoru nedostaje kandidata bošnjačke nacionalnosti (- 2,2), hrvatske nacionalnosti (- 0,5), srpske nacionalnosti (+ 0,5), te ostalih (- 0,8).

Prilikom odlučivanja o imenovanju Vijeće je imalo u vidu prethodno navedenu nacionalnu strukturu u Okružnom javnom tužilaštvu u Prijedoru, ali i okolnosti dužeg bolovanja glavne tužiteljice, te da su tužioci u ovom tužilaštvu duplo ili čak i više zaduženi predmetima u odnosu na druga tužilaštva u Republici Srpskoj. Iako je u ovom tužilaštvu vidljivo nadprosječno zalaganje tužilaca koji ostvaruju visoku normu, rješavaju visok procenat planova za rješavanje predmeta, nažalost, broj neriješenih predmeta raste u toku svakog izvještajnog perioda. Imajući u vidu navedeno, Vijeće je, s ciljem nesmetanog funkcionisanja ovog tužilaštva, imenovalo jednog tužioca, uzevši kao prioritet potrebe ovog tužilaštva na uštrb minimalnog odstupanja od nacionalne strukture a imajući u vidu zadaću VSTV-a BiH da vodi računa prioritarno o kvaliteti i efikasnosti rada pravosudnih institucija.

Uzimajući u obzir sve prethodno navedeno, Vijeće je primjenom kriterija iz člana 43. st. (1) i (2) Zakona o VSTV-u BiH, a u vezi sa okolnostima iz člana 59b. stav (5) i člana 61. Poslovnika VSTV-a BiH ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju tužiteljice Okružnog javnog tužilaštva u Prijedoru.

U skladu sa članom 86. stav (8) Zakona o VSTV-u BiH sudija ili tužilac koji je prvi put imenovan na funkciju u pravosuđu, početni izvještaj dostavlja u roku od 30 dana od dana imenovanja na funkciju.

U pogledu stava II. dispozitiva ovog rješenja o stupanju na dužnost imenovanog, isto se odgađa do okončanja dodatne provjere iz člana 86d. stav 6) Zakona o VSTV-u BiH, odnosno do okončanja upravnog spora, ukoliko je pokrenut protiv rješenja o imenovanju.

JAVNO

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-3294-1/2025

Datum: 25.09.2025. godine

MP
Predsjednik
Sanin Bogunić



